

南
北
史
合
注

欽定四庫全書

南北史合注卷一百四十八

明 李清 撰

北史六十二

孫誼 獨孤信 子羅

賀蘭祥

閻慶 子毗

叱列伏龜

史寧 子雄祥

權景宣

王盟字仲明德后兄也其先樂浪人父羆伏波將軍以
良家子鎮武川因家焉魏正光中破六韓拔陸攻陷諸
鎮盟亦為所擁拔陸平流寓中山復以積射將軍從蕭
寶夤西征寶夤偕逆盟逃匿人間及爾朱天光入關盟
從之隨賀拔岳擒万俟醜奴平秦隴常先登力戰及周
文平侯莫陳悅除盟原州刺史大統三年拜司徒迎魏
文帝悼后於柔然遷太尉魏文帝東征以留後大都督
行雍州事節度關中諸軍趙青雀之亂盟與開府李虎

輔太子出頓渭北事平爵長樂郡公賜姓拓跋氏

周書作拓王氏

九年進太傅加開府儀同三司盟盜度弘雅仁而汎愛
雖居師傅冠群后而謙恭自處未嘗以勢位驕人魏文
帝甚尊重之及疾數幸其第親問所欲十一年卒贈本
官謚孝定子勳字醜興性忠果有材幹年十七從周文
入關及平秦隴定關中周文嘗謂曰為將坐見成敗者
上也被堅執銳者次也勳曰意欲兼之周文大笑拜

散騎常侍賜爵梁甫縣公大統初為千牛備身直長領左右出入卧内小心謹厚魏文帝常曰王勣可謂不二心臣也沙苑之役勣以都督領禁兵居左翼當其前者死傷甚衆勣亦被傷重遂卒於行間周文深悼之贈使持節太尉尚書令十州諸軍事雍州刺史追封咸陽郡公謚忠武勣弟懋字小興盟西征以懋尚幼留山東永安中始入關與盟相見遂從征伐大統初累遷右衛將軍時疆場交兵未申喪紀服齊斬者並墨縗從事及盟

卒懋上表辭位乞終喪制魏文帝不許累遷開府儀同
三司侍中領軍將軍懋性溫和小心敬慎宿衛宮禁十
餘年勤恪當官未嘗有過廢帝時爵安寧郡公累官小
司寇卒於官盟兄子顯位大將軍卒子誼字宜君少有
大志便弓馬博覽群言周孝閔時為左中侍上士時大
冢宰宇文護執政帝拱默無所關預有朝士於帝側微
不恭誼勃然進將擊之其人惶懼請罪乃止自是朝臣
無敢不肅遷御正大夫父艱毀瘠過禮廬於墓側負土

成墳武帝即位累遷內史大夫封楊國公從帝伐齊至并州帝既入城反為齊人所敗左右多死誼率麾下驍雄赴之

周書曰帝賴以全濟時帝以六軍挫衄將班師誼固諫

資治通鑑曰誼以為去必不免

齊平自相州刺史徵為大內史汾州稽胡亂誼擊之帝弟越王盛譙王儉雖為總管並受誼節度賊平封一子

開國公帝臨崩謂皇太子曰王誼社稷臣宜處以機密
不須遠任及即位是為宣帝憚誼剛正出為襄州總管
及隋文為丞相鄖州總管司馬消難舉兵以誼為行軍
元帥攻之未至消難奔陳又攻巴蠻渠帥蘭洛州之附
消難者

嗟乎周朝諸將相不及一巴蠻蘭洛州知義可羞也
本史兩攻皆書討今改正之

旬月皆平帝遣使勞問冠蓋不絕以第五女妻其子秦

孝尋拜大司徒詎自以與隋文有舊亦歸心焉及受禪顧遇彌厚帝親幸其第與之極歡太常卿蘓威儀戶口滋多人田不贍欲減功臣之地給人詎奏曰此皆歷世勲賢方蒙爵土一旦削之未見其可

周書又曰如臣所虞正恐朝臣功德不逮何患人田不足

帝然之竟寢及將幸岐州詎諫曰陛下初臨萬國人情未洽何用此行帝戲之曰吾昔與公位望齊等一朝屈

節為臣或當耻愧是行也欲振揚武威服公心耳詎笑而退尋奉使突厥帝嘉其稱旨進郢國公未幾其子奉孝卒踰年詔表言公主少請除服御史大夫楊素劾詔曰臣聞喪服有五親疎異節喪制有四降殺殊文王者所常行故曰不易之道而儀同王奉孝既尚蘭陵公主以去年五月身喪始經一周而詔便請除釋竊以雖曰王姬終成下嫁之禮公則主之猶在移天之義夫婦之間則人倫攸始喪紀之制人道至大苟不重之取笑君子

故鑽燧改火責以居喪之速朝梓暮歌譏以忘哀之早
誼爵位已重欲為無禮薄俗傷教為父則不慈輕禮易
喪致婦於無義若縱而不止恐傷風俗詔不問然恩禮
稍薄誼頗怨望或告誼謀反帝令案其事主者奏誼有
不遜之言實無反狀帝賜釋之時上柱國元諧亦頗失
意誼數與往來言論醜惡胡僧告之公卿奏誼大逆不
道罪當死帝見誼愴然曰朕與公舊同學甚相憐愍奈
國法何於是詔曰誼有周之世早預人倫朕共遊庠序

遂相親好然性懷險薄正現盈門鬼言怪語稱神道聖
朕受命之初深存戒約口云改悔心寔不悛乃說四天
王神道誼應受命書有誼讖天有誼星桃鹿二川岐州
之下歲在辰巳興帝王之業密令卜問伺殿省之災又
說其身是明王聖主信用左道所在誑誤自言相表當
王不疑此而赦之將或為亂禁暴除惡宜伏國刑帝復
令大理正趙綽謂誼曰時命如此將若之何賜死於家
時年四十六

獨孤信雲中人本名如願魏初有四十六部其先伏留屯者為部落大人與魏俱起祖俟尼和平中以良家子自雲中鎮武川因家焉父庫者為領民酋長少雄豪有節義北州咸敬服之信美容儀善騎射正光末與賀拔度等同斬衛可環由是知名後為葛榮所獲信既少年好脩飾服章軍中號獨孤郎爾朱榮破葛榮以信為別將從征韓婁信匹馬挑戰擒賊漁陽王袁賜周後以破北海王元顥黨賜爵受德縣侯遷武衛將軍賀拔勝出

鎮荊州表信為大都督及勝弟岳為侯莫陳悅所害勝
令信入關撫岳餘衆屬周文帝已統岳兵與信鄉里少
相友善相見甚歡因令信入洛請事至雍州大使元毗
又遣還荊州尋徵入朝魏孝武雅相委任及西遷事起
倉卒信單騎追及於灑澗孝武嘆曰武衛辭父母捐妻
子隻身從我世亂識忠良然哉進爵浮陽郡公時荊州
雖陷東魏人心猶戀本朝乃以信為衛大將軍都督三
荊州諸軍事兼尚書右僕射東南道行臺大都督荊州

刺史以招懷之

周書曰信至武陶東魏遣弘農太守田八能率蠻衆拒信又遣都督張齊民以步騎三千出信後信曰今我士卒不滿千人而首尾受敵若退擊齊民則敵謂我却走必來要截未若先破八能遂奮擊八能敗之齊民亦潰

既至東魏刺史辛纂出戰

周書曰士庶既懷信舊恩信臨陳諭之莫不解體

信縱兵擊纂大敗之都督楊忠等前驅斬纂三荆遂定
東魏又遣其將高敖曹侯景等奄至信以衆寡不敵率
麾下奔梁居三載梁武方許信還北信父母在山東梁
武問信所往荅以事君無二梁武義之禮送甚厚大統
三年至長安以虧損國威上書謝罪魏文帝付尚書議
之七兵部書陳郡王元玄等議既經恩降請赦罪復職
周書曰玄等議信任當推轂遠襲寢宛斬賊帥辛纂
寔合嘉賞但庸績不終旋致淪沒然孤軍數千後援

未接難以自固既經恩降理絕刑書請赦罪復職魏文帝詔曰信荆襄之役寔展功效及力絕道窮還朝路絕適事求宜未足稱過况避難勾吳誠貫夷險良可嘉嘆止云免咎理乖通變

詔轉驃騎大將軍加侍中開府尋拜領軍將軍仍從復弘農破沙苑改封河內郡公俘鹵中有信親屬始得父凶問乃發喪行服尋起為大都督與馮翊王元季海入洛陽潁豫襄廣陳留之地並款附四年東魏將侯景等

圍洛陽信據金墉城隨方拒守旬有餘日及周文帝至
瀍東景等退走信與李遠為右軍戰不利東魏有洛
陽六年侯景寇荊州周文令信與李弼出武關景退即
以信為大使慰撫三荆尋除隴右十一州大都督秦州
刺史先是守宰闇弱政令乖方人有冤訟歷年不決及
信在州事無擁滯示以禮教勸以耕桑數年中公私富
實流民願附者數萬家周文以其信著遐邇賜名信七
年岷州刺史赤水蕃王梁公定舉兵反詔信討之公定

尋為部下所殺而公定子弟仍收其餘衆信乃勒兵向萬年頓三交谷口賊併力拒守信因詭道趣稠松嶺賊不虞信兵至望風奔潰乘勝逐北徑至城下賊並出降加授太子太保邛山之戰大軍不利信與于謹帥散卒自後擊之齊神武追騎驚擾諸軍因得全及涼州刺史宇文仲和據州不受代周文令信率開府怡峯討之仲和嬰城固守信夜令諸將以衝梯攻其東北信親率壯士襲其西南達明克之擒仲和鹵其六千戶送長安拜

大司馬十四年進柱國大將軍錄前後功增封聽回授
諸子於是第二子善封魏寧縣公第三子穆文侯縣侯
第四子藏義寧縣侯邑各千戶第五子順武成縣侯第
六子陔建忠縣伯邑各五百戶信在隴右歲久啓求還
朝周文不許或有自東魏來者又告其母凶問信發喪
行服

周書曰魏太子與太祖巡北邊因至河陽弔信

信陳哀苦請終禮制又不許追贈信父庫者司空公信

母費連氏常山郡君周文閔踐阼累遷大宗伯進封衛國公邑萬戶趙貴誅後信以同謀坐免居無幾晉公護復欲殺之以名望素重不欲顯其罪過逼令自盡於家王志堅讀史商語曰信歸西魏自言事君無二似已顧以孝武為君則已被弑若以元氏子孫為君東西魏等爾視父母所在歸之於臣節未失若以高歡逐君不入其國則秦亦弑孝武者棄父與母而盡忠於未定君臣之宇文卒以自殉信之去就誤已愚按

此言極正然既從孝武入關豈可迴面高歡信亦欲
負吾初心云爾

時年五十五信美風度雅有奇謀大略周文初啓霸業
惟有關中以隴右形勝故委信鎮之既為士民所懷聲
震憐國東魏將侯景南奔梁魏收為檄梁文矯稱信據
隴右不從宇文氏乃云無關西之憂欲以威梁人也又
信在秦州嘗因獵日暮馳馬入城帽微側詰旦吏人有
戴帽者咸慕信而側帽其為憐境及士庶所重如此子

羅先在東魏以次子善嗣及齊平羅至而善卒又以羅
嗣信長女周明帝敬后第四女唐元貞后第七女隋文
帝獻后周隋及唐三代皆為外戚古未有也隋文帝踐
極乃下詔褒贈信太師上柱國十州諸軍事冀州刺史
封趙國公諡曰景其父母皆加贈謚羅字羅仁父信隨
魏孝武入關羅遂為高氏所囚及信為宇文護誅羅始
見釋寓居中山孤貧無以自給齊將獨孤永業以宗族
哀之為買田宅以資畜初信入關後復娶二妻妻郭氏

生子六人善穆藏順陔整崔氏生隋獻后及齊亡隋文帝為定州總管獻后遣人求羅得之相見悲不自勝侍御者皆泣於是厚遺車馬財物未幾周武帝以羅功臣子久淪異域徵拜楚安郡太守以疾去官歸京師諸弟見羅少長貧賤每輕侮不以兄禮事之然性長者亦不與諸弟競后由是重之文帝為丞相拜羅儀同常置左右既受禪詔追贈羅父其諸弟以羅母沒齊先無夫人號不當承襲帝以問后后曰羅誠嫡長不可誣也襲爵

趙國公以其弟善為河內郡公穆為金泉縣公藏為武平縣公陔為武喜縣公整為千牛備身累擢羅左衛將軍前後賞賜不可勝計進上柱國徵拜左武衛大將軍煬帝嗣位改封蜀國公未幾卒官諡曰恭子纂嗣位河陽都尉纂弟武都為河陽都尉庶長子開遠別見善以上開府除兗州刺史政在簡惠士民安之卒官陔仕周胥附上士坐父徙蜀十餘年宇文護誅始歸長安隋文帝受禪拜上開府累轉延州刺史陔性好左道其外祖

母高氏先事猫鬼已殺其舅郭沙羅因轉入其家

隋書曰其妻母先事猫鬼因轉入其家與北史不同
帝微聞而不信會獻后及楊素妻鄭氏俱疾召鑿視之
皆曰此猫鬼疾帝以阼后之異母弟阼妻楊素之異母
妹意阼所為陰令其兄左監門郎將穆以情喻之帝又
避左右諷阼阼言無有帝不說左轉遷州刺史出怨言
帝令左僕射高穎納言蘓威大理正皇甫孝緒大理丞
楊遠等雜索之阼婢徐阿尼言本從阼母家來常事猫

鬼每以子日夜祀之言子者鼠也其猫鬼每殺人者所
死家財物潛移於畜猫鬼家施嘗從家中索酒其妻曰
無錢可酤施因謂阿尼曰可令猫鬼向越公家使我足
錢阿尼便呪之居數日猫鬼向素家後上初從并州還
施於園中謂阿尼曰可令猫鬼向皇后所使多賜吾物
阿尼復呪之遂入宮中楊遠乃於門下外省遣阿尼呼
猫鬼阿尼於是夜中置香粥一盆以匙扣而呼曰猫女
可來無住宮中久之阿尼色正青若被牽拽者云猫鬼

已至帝以其事下公卿竒章公牛弘曰妖由人興殺其人絕矣帝令犢車載阼夫妻將賜死於家阼弟司勳侍中整詣闕求哀於是免阼死除名以其妻楊氏為尼先是有人訟其母為人猫鬼所殺者帝以為妖妄怒遺之及此詔誅被訟行猫鬼家阼未幾卒煬帝即位追念舅氏聽以禮葬累贈銀青光祿大夫

竇熾字光成扶風平陵人後漢大鴻臚章之後章子統靈帝時為鴈門太守避竇武之難亡奔匈奴遂為部落

大人後魏南徙子孫因家代賜姓紇豆陵氏累世仕魏皆至大官父略平遠將軍孝文時復氏實

愚按新唐書云代北諸姓元長孫宇文于陸源竇首之不列之中國姓氏而仍列代北恐竇氏自附扶風與于氏自附東海皆假托也

熾性嚴明有謀略美鬚髯身長八尺二寸少從范陽析忻受毛詩左氏春秋粗通大義善騎射膂力過人魏正光末北鎮擾亂乃隨略避地定州投葛榮榮欲官略略

不受榮疑其有異志遂留略於冀州將熾及熾兄善隨
軍爾朱榮破葛榮熾乃將家隨榮於并州時葛榮別帥
韓婁等據薊城不下以熾為都督從驃騎將軍侯深討
之熾手斬婁以功拜揚烈將軍魏孝武即位柔然等諸
蕃遣使朝貢帝臨軒宴之有鴟飛鳴殿前帝知熾善射
欲矜示遠人乃給熾御箭兩隻命射之鴟應弦落諸蕃
人咸嘆異帝大悅尋隨東南道行臺樊子鵠追爾朱仲
遠仲遠奔梁時梁武又遣元樹入寇據譙城子鵠令熾

擊破之封上洛縣伯時帝與齊神武構隙以熾有威重
堪處爪牙拜朱衣直閣遂從帝西遷仍與其兄善至城
下與武衛將軍高金龍戰於千秋門敗之因入官城取
御馬四十匹并鞍勒進之行在帝大悅賜熾及善駿馬
各二匹大統元年從周文帝擒竇秦復弘農破沙苑皆
有功河橋之戰諸將退走熾時獨從兩騎為敵人所追
至邛山熾乃下馬背山抗之俄敵衆漸多矢下如雨熾
騎士所執弓並為敵人所射破熾乃摠收其箭射之所

中人馬應弦而倒敵乃相謂曰得此三人未足為功乃稍引退熾因其怠遂突圍得出又從太保李弼討白額稽胡破之高仲密以北豫州來附熾從周文援之至洛陽會東魏人據邙山為陣周文命留輜重於瀍曲率輕騎奮擊中軍與右軍大破之悉鹵其步卒熾獨追至右濟而還大統十三年進使持節驃騎大將軍開府儀同三司加侍中出為涇州刺史蒞職數年政號清靜魏廢帝元年除原州刺史熾抑挫豪右申理幽滯在州十載

甚有政績州城北有泉水熾屢經游踐嘗與僚吏宴泉側酌水自飲曰吾在此州唯當飲水而已及去職後吏民感其遺惠每至此泉者莫不懷之恭帝元年進爵廣武郡公屬柔然寇廣武熾與柱國趙貴分路討之柔然引退熾渡河至麴伏川追及大破之武成二年拜柱國大將軍周明帝以熾前朝舊臣勲望兼重欲獨為造第熾辭以天下未平干戈未偃不宜輒發徒役周明不許尋帝崩事方寢保定元年進封鄧國公邑一萬戶天和

五年自大宗伯為宜州刺史先是周文田於渭北令熾
晉公護分射走免熾一日獲十七頭護十一頭獲恥不
及因以為嫌至是熾又為周武年長有勸護歸政之議
護惡之故左遷及護誅徵拜太傅熾既元老名望素隆
軍國大謀常與叅議嘗有疾帝幸其第問之因賜金石
之藥其見禮如此帝於大德殿將謀伐齊熾年已衰老
乃扼腕曰臣雖朽邁請執干櫓首啓戎行得一覩誅剪
鯨鯢廓清寰宇省方觀俗登岳告成然後歸魂泉壤無

復餘恨帝壯其志節遂以熾第二子武當公恭為左二軍總管齊平後帝召熾歷觀相州官殿熾拜賀曰陛下真不負先帝矣帝大悅進上柱國宣政元年兼雍州牧及周宣營建東京以熾為京洛營作大監宮苑制度皆取決焉隋文帝入輔政停洛陽宮作熾請入朝屬尉遲迥舉兵熾移入金墉與洛州刺史平涼公元亨同心固守仍權行洛陽鎮事相府平熾方入朝屬文帝初為相國百寮皆勸進自以累世受恩遂不肯著殿時人皆高

其節及帝踐極拜太傅加殊禮贊拜不名開皇四年八月卒時年七十八贈八州諸軍事冀州刺史謚曰恭熾事親孝奉諸兄以悌順聞及望位隆重子孫皆處列位遂為當時盛族子茂嗣熾兄善封永富縣公善子榮定沉深有器局容貌魁偉美鬚髯便弓馬初為魏文帝牛備身周文帝見而奇之授平東將軍後從周文與齊人戰北邙西師不利榮定與汝南公宇文神慶帥精騎擊却齊師以功再進開府襲爵永富公除忠州刺史從

平齊加上開府拜前將軍伏飛中大夫其妻乃隋文帝
姊安成長公主文帝少與之甚厚榮定亦知帝有人君
之表尤相推結及帝作相領左右宮伯使鎮守天臺搃
露門內兩廂仗衛當宿禁中遇尉遲迴初平朝廷頗以
山東為意拜榮定為洛州總管鎮之賜西涼女樂一部
及受禪來朝坐事除名公主曰天子姊乃作田舍兒妻
帝不得已拜右武侯大將軍數幸其第恩錫甚厚每令
尚食局日供羊一口珍味稱是以佐命功拜上柱國歷

秦州總管賜吳樂一部突厥沙鉢略寇邊為行軍元帥
率九摠管出涼州與鹵戰於高越原兩軍相持地無水
士卒渴甚至刺馬血飲死者十二三榮定仰天太息俄
澍雨軍復振於是進擊數挫其鋒突厥憚之請盟而去
進爵安豐郡公復封子憲為安康郡公歲餘拜右武衛
大將軍帝欲以為三公榮定上書固辭陳畏懼之道
隋書載榮定上書曰臣每觀西朝衛霍東都梁鄧寵
積驕盈咸至傾覆向使前賢少自貶損遠避權勢推

而不居則天命可保何覆宗之有每覽前脩寔為畏懼

帝乃止前後賞賜不可勝計及卒帝為之廢朝令左衛大將軍元昊監護喪事賻絹三千疋帝謂侍臣曰吾每欲致榮定於三軍固讓不可今欲賜之重違其志於是贈冀州刺史陳國公諡曰懿子抗嗣美容儀性通率長於巧思父卒後恩遇彌厚所賜錢帛金寶亦鉅萬至檢校幽州總管煬帝即位漢王諒反疑抗與通謀除名以

其弟慶襲陳公慶亦有姿容性和厚頗工草隸歷衛尉
卿大業末出為南郡太守為盜所害慶弟雄亦工草隸
頗解鍾律歷潁州南郡扶風太守熾兄子毅字天武父
岳早卒毅深沉有器度事親以孝聞魏孝武初起家員
外散騎侍郎時齊神武擅朝毅慨然有狗主之志從孝
武西遷又從擒竇泰復弘農戰沙苑皆有功爵安武縣
公恭帝元年進驃騎大將軍開府儀同三司大都督出
為幽州刺史周孝閔踐阼進爵神武郡公保定三年拜

大將軍時與齊人爭衡戎車歲動並交結哭厥為外援
哭厥已許納女於周齊人亦甘言重幣遣使求婚狄人
便內悔乃令楊荐等累使結之往返十餘方復前好及
往逆女猶懼改圖以毅地兼勲戚素有威重乃令為使
及毅至齊使亦在哭厥君臣猶貳志毅抗言正色以大
義責之累旬乃定卒以后歸朝議嘉之歷大司馬

唐書毅第二女唐太穆后聞隋文帝篡周自投堂堂
下曰恨我非男子不能掬舅家禍毅及襄陽公主遠

掩其口曰無妄言滅吾族然以是奇之

隋開皇初拜定州總管累居藩鎮咸得民和二年卒於
州贈襄鄆等六州刺史謚曰肅毅性溫和每以謹慎自
守又尚周文帝第五女襄陽公主特為朝廷委信雖任
兼出納未嘗有矜惰之容時以此稱焉子賢嗣

賀蘭祥字盛樂其先與魏俱起有乞伏者為賀蘭莫何
弗因以為氏後有以良家子鎮武川者遂家焉父初真
少知名為鄉閭所重尚周文帝姊建安長公主保定二

年追贈祥年十一而孤居喪合禮長於舅氏特為周文帝所愛雖在戎旅常博延儒生教以書傳周文初入關祥與晉公護俱在晉陽後乃遣使迎致之解褐奉朝請少有膽氣志在立功尋擢補都督恒居帳下從平侯莫陳悅又迎魏孝武仍從擊潼關獲東魏將薛長儒復攻回洛拔之還拜左右直長大統十四年除都督荆川刺史以前後功累進爵博陵郡公先是祥嘗行荊州事雖未朞月頗有惠政至是重徃士民安之漢南流人襁負

至者日有千數遠近蠻夷莫不款附祥隨機撫納咸得
其歡心時盛夏亢陽祥親巡境內觀政得失倘見發掘
古冢暴骸者乃謂守令曰此豈仁者為政邪命所在收
葬之即日澍雨是歲大有年境內多古墓俗好行發掘
至是遂息祥雖周文密親性甚清素州境南接襄陽西
通岷蜀物產所出多諸珍異既與梁通好行李往來公
私贈遺一無所受梁宣帝時以岳陽王刺史雍州欽其
風素乃以竹屏風絺綌之屬及經史贈之祥難違其意

取付所司周文後聞之並賜祥十六年拜大將軍周文以涇渭漑灌處渠堰廢毀乃令祥修造富平堰開渠引水東注於洛功用既畢民獲其利魏廢帝二年以祥刺史同州尋拜尚書左僕射周孝閔踐阼進柱國大司馬時晉公護執政祥與護中表少相親愛軍國之事護皆與祥參謀及誅趙貴廢帝祥有力焉武成初吐谷渾侵涼州郡詔祥與宇文貴搃兵討之祥乃遣其軍司檄吐谷渾與渾廣定王鍾留王等戰破之因拔其洮陽洪和

二城以其地為洮州撫安西土振旅而還進封涼國公
卒贈太師同岐等十二州諸軍事同州刺史謚曰景有
七子第三子璨開府儀同三司宣陽郡公建德五年從
駕并州戰歿贈上儀同大將追封清郡公

叱列伏龜字摩頭陁代郡西部人其先部落大人魏初
入附遠世為第一領民酋長至龜五世矣龜容貌瓌偉
腰帶十圍進止詳雅兼有武藝嗣父業復為領民酋長
魏孝昌三年以別將從長孫稚西征累遷金紫光祿大

夫從還洛授都督遂為齊神武所寵任加授大都督沙苑之敗隨例來降周文帝以其豪門解縛禮之仍以邵惠公女妻之大統四年封長樂縣公自此常從征討有戰功歷侍中驃騎大將軍開府儀同三司恒州刺史卒

子椿嗣

閻慶字仁度河陰人家雲州之盛樂郡父進有謀略勇冠當時正光中拜龍驤將軍屬衛可瓌作亂攻圍盛樂進率衆拒守

周書曰進率衆拒守綿歷三載晝夜交戰未嘗少息
以少擊衆城竟獲全

以功拜盛樂郡守慶幼聰敏重然諾風儀端肅望之儼
然隨父固守盛樂頗有力拜別將後以軍功拜步兵校
尉中堅將軍旣而齊神武舉兵入洛魏孝武西遷慶謂
所親曰高歡將有篡逆之謀豈可苟安目前受其控制
也遂以大統三年自宜陽歸闕稍遷後將軍以功

周書曰邛山之戰先登陷陳

爵安次縣伯慶善於綏撫士卒未休未嘗先舍故能盡其死力屢獲勲勞累遷散騎常侍驃騎大將軍開府儀同三司雲州大中正加侍中賜姓大野氏周孝閔踐阼出為河州刺史州居河外地接戎夸慶留心撫納頗稱簡惠就拜大將軍進爵太安郡公入為小司空歷雲寧二州刺史慶性寬和不苛察士民悅之天和五年進柱國晉公護母慶之姑護雖擅朝慶未嘗阿附及護誅武帝以此重之詔慶第十二子毗尚帝女清都公主慶雖

位望隆重婚連帝室常以謙慎自守時以此稱之建德
二年抗表致事優詔許焉慶既衰老恒嬰沉痾宣帝以
其先朝耆舊詔靜帝特至第問疾賜布千段醫藥所須
令有司供給大象二年拜上柱國隋文帝踐極又令皇
太子就第問疾仍供壘藥費開皇二年卒年七十七贈
司空七州諸軍事荊州刺史謚曰成子毗嗣毗七歲襲
爵石保公及長儀貌矜嚴頗好經史受漢書於蕭該略
通大旨能篆書草隸尤善為當時之妙周武帝見而悅

之因命尚主隋文帝受禪以技藝侍東宮數以瑠麗之物取悅皇太子甚見親待每稱於帝尋拜車騎宿衛東宮帝嘗遣高頰大閱於龍臺澤諸軍部伍多不齊整唯毗一軍法制肅然頰言於上特蒙賜帛俄兼太子宗衛率長史尋加上儀同太子服翫之物多毗所為及太子廢毗坐杖一百與妻子俱配為官奴婢二歲放免煬帝嗣位盛脩軍器以毗性巧練習舊事詔典其職尋授朝請郎毗立議輦輅車輿多所贈損擢拜起部郎帝嘗大

備法駕嫌屬車太多顧謂叱曰開皇之日屬車十二乘於事亦得今八十一乘以牛駕車不足益文物朕欲減之從何為可叱曰臣初定數共宇文愷參詳故實據漢胡伯始蔡邕等議屬車八十一乘此起於秦遂為後式故張衡賦云屬車九九是也次及法駕三分減一為三十六乘此漢制也又據宋孝建時有司奏議晉遷江左惟設五乘尚書建平王宏曰八十一乘義兼六國三十六乘無所準憑江右五乘儉不中禮但帝王文物旒

之數爰及冕玉皆用十二今宜準此設十二乘開皇平
陳因以為法今憲章往古大駕依秦法駕依漢小駕依
宋以為差等帝曰何用秦法大駕宜三十六法駕宜十
二小駕除之毗研精故事皆此類也長城之役毗摠其
事尋轉殿內丞從幸張掖郡高昌王朝于行所詔毗持
節迎勞遂將護入東都尋以母憂去職未朞起令視事
將興遼東之役自洛口開渠達涿郡以通漕毗督其事
明年兼領右翊衛長史營建臨朔宮及征遼東以本官

領武賁郎將典宿衛時軍圍遼東城帝令毗詣城下宣諭賊弓弩亂發流矢中所乘馬毗顏色不變辭氣抑揚卒事而去遷將作少監後復從帝征遼東會楊玄感作逆帝班師從至高陽郡卒帝甚悼惜之贈殿內監

史寧字未和建康袁氏人家於撫寧鎮父遵樓煩郡守寧少以軍功累加持節征東將軍金紫光祿大夫賀拔勝為荊州刺史寧以本官為勝軍司隨勝之部會荆蠻騷動三鴟路絕寧先驅平之因撫慰蠻左翕然降附尋

除南郢州刺史及勝為大行臺表寧為大都督攻梁下
澁戍破之又攻拔梁齊興鎮等九城未及論功屬孝武
西遷東魏遣侯景寇荊州寧隨勝奔梁梁武引寧至香
澄前謂之曰觀卿風表終是富貴我當使卿錦還寧荅
曰臣位為列將本朝傾覆不能北面事逆賊幸得息肩
有道儻如明詔欣幸寔多因涕泣橫流梁武為動容在
梁二年勝乃與寧密圖歸計寧曰朱异為梁主信任請
往見之勝然其言寧乃見异申以投分之言徹託思歸

之意辭氣雅至异亦嗟悒為奏聞梁武果許之大統二
年同勝自梁歸久之遷車騎將軍行涇州事時賊帥莫
折後熾寇掠居民寧率州兵與行原州事李賢討破之
轉東義州刺史東魏亦以胡梨苟為東義府刺史寧僅
得入州梨苟亦至寧逆擊破之斬其洛安郡守馮善道
州既隣接疆場士民流移寧留心撫慰咸來復業轉涼
州刺史寧未至而前刺史宇文仲和據州作亂詔獨信
信與寧討之寧先至涼州為陳禍福城中吏民皆相率

降附仲和仍據城不下尋亦克之後遷驃騎大將軍開
府儀同三司加侍中十六年宕昌叛羗獠甘作亂逐其
王彌定而自立并連結傍乞鐵忽及鄭五醜等詔寧率
軍與宇文貴豆盧寧等討之寧別擊獠甘而山路險阻
纔通單騎獠甘已分其黨立柵守險寧進兵攻之遂破
其柵獠甘將百騎走投生羗鞏廉玉彌定遂得復位寧
以未獲獠甘遂進軍

周書曰寧以未獲獠甘密欲圖之乃揚聲欲還獠甘

聞之復招引叛羗依山起柵欲攻彌定寧謂諸將曰
此羗入吾術中矣當進兵擒之諸將咸欲歸寧曰一
日縱敵數世之患豈可舍將滅之寇更煩再舉人臣
之禮知無不為如更阻衆寧豈不能斬諸君乎

大破之生獲獠甘狗而斬之并執鞏廉玉送闕所得軍
實悉分賞將士寧無私焉師還召寧率所部鎮河陽寧
先在京州戎夷服其威惠遷鎮後邊人並思慕之魏廢
帝元年復除梁甘瓜三州諸軍事涼州刺史初柔然與

魏和親後更離叛尋為突厥所殺殺其主阿那瓌部落
逃逸者仍奉瓌子孫抄掠河右寧率兵邀擊獲瓌子孫
二人并其種落酋長自是每戰破之前後數萬人凡四
進爵為安政郡公二年吐谷渾通使於齊寧擊獲之就
拜大將軍寧後遣使詣周文帝請事周文即以所服冠
履衣被及弓箭甲稍等賜寧謂其使曰為我謝涼州孤
解衣衣公推心委公善始令終無損功名也時突厥木
汗可汗假道涼州將襲吐谷渾周文令寧率騎隨之軍

至番禾吐谷渾已覺奔於南山木汗將分兵追之令俱會於青海寧謂木汗曰樹郭賀真二城是吐谷渾巢穴若拔其本根餘種自散此上策也木汗從之即分為兩軍木汗從北道向賀真寧趣樹敦渾婆周王率衆逆戰寧擊斬之踰山履險遂至樹敦樹敦是渾舊都多諸珍藏而渾主先已奔賀真留其征南王及數千人固守寧進兵攻之偽退渾人果開門逐之因回兵奮擊門未及闔寧兵遂得入生獲其征南王浮鹵男女財寶盡歸諸

突厥澤賀羅拔王依險為柵

周書曰周迴五十餘里

欲塞寧路寧攻破之木汗亦破賀真鹵渾主妻子大獲珍物寧還軍青海與木汗會木汗握寧手歎其勇決并遺所乘良馬令寧於帳前乘之本汗親自步送突厥以寧所圖必破皆畏憚之咸曰此中國神智人也及將班師木汗又遺寧奴婢一百口馬五百匹羊一萬口還州尋被徵入朝屬周文帝殂寧悲慟不已乃請赴陵所盡

哀并告行師克捷周孝閔踐阼拜小司徒出為荊州刺史荆襄浙郢等五十二州及江陵鎮防諸軍事寧有謀畫識兵權臨敵指撝皆如其策甚得時譽及在荊史頗自奢縱貪濁不脩法度嘗出有人訴州佐屈法寧還付被訟者治之自是有事不敢復言聲名大損於西州保定三年卒於州謚曰烈子雄嗣雄少勇敢膂力過人便弓馬有筭略年十四從寧迎周文於牽屯山仍從校獵弓無虛發周文歎異之尋尚周文女永富公主累遷司

馭中大夫從柱國袍罕公辛威鎮金城遂卒於軍雄弟
祥字世休少有文武才幹仕周太子車右中士隋文帝
踐阼拜儀同領交州事爵陽城郡公在州頗有惠政轉
驃騎將軍伐陳之役從宜陽公王世積出九江道破陳
師進拔江州文帝大悅下詔慰勉之進上開府後以行
軍總管從晉王廣破突厥於靈武遷右衛將軍仁壽中
率兵屯弘化備胡煬帝時在東宮遺祥書論舊行兵時
事申以恩旨祥為書陳謝

隋書載太子與祥書曰將軍總戎塞表胡鹵清塵秣
馬休兵猶事校獵足使李廣慙勇魏尚愧能昔余濫
舉推轂治兵同行軍旅契闊戎旃將軍英圖不世猛
氣無前但物不遂心餽俛從事每一思此我勞如何
近者陪隨鑾駕言旋上京本即述職南蕃宣條下國
不悟皇鑒曲發備位少陽所望故人匡其不逮比監
國多暇養疾閑宮厭北閣之端居罷南皮之馳射博
望之苑既乏名賢飛蓋之園理乖終宴親朋遠矣琴

書寂然想望吾賢疾如疾首祥荅書曰行人戾止恩
紀綢繆不謂飛雪增冰之地忽載三陽毳幙韋韞之
鄉俄聞九奏祥幸以先人緒餘備職宿衛駑蹇無致
遠之用朽薄非折衝之才曩者王師薄伐絕漠揚旌
猛將謀夫如雲如雨列於卒伍預聞指蹤之規幸免
逗遛之責爰以情喻雷陳事方劉葛信聖人之屈已
非庸人之擬議伏承監國多暇養德怡神咀嚼六經
逍遙百氏追西園愛客眷南皮出遊疇昔之恩無忘

造次祥身在邊隅情馳魏闕每至清風夕起明月孤
照想鳴葭之起路思託乘於後車塞表京華山川悠
遠瞻望浮雲伏增潛結

太子甚親遇之及即帝位漢王諒作亂遣其將綦母良
自滏口徇黎陽塞白馬津余公理自太行下河內帝以
祥為行軍總管軍於河陰久不得濟祥謂軍吏曰余公
理輕而無謀又新得志謂其衆可恃恃衆必驕且河北
人先不習兵擁市人而戰不足圖也乃令軍中脩其攻

具公理使謀知之果屯兵河陽城內以備祥祥乃艤舟南岸公理聚甲當之祥簡精銳于下流潛渡公理拒之未成列祥縱擊大破之東趣黎陽討綦良棄軍走其衆大潰進上大將軍賜縑綵七千段女妓十人轉太僕卿帝嘗賜祥詩曰伯斐朝寄重夏侯親遇深貴耳唯聞古賤目詎知今早擢勁草質久有背淮心掃逆黎山外振旅河之陰功已書王府留情太僕箴祥上表辭謝帝手詔曰昔勞公問罪河朔賊爾日塞兩關之路據倉阻河

公竭誠奮勇一舉而克故聊示所懷何謝也尋賜鴻臚
卿從征吐谷渾祥出玉門道擊鹵破之進右光祿大夫
拜右驍衛大將軍及征遼東出蹋頓道不利除名俄拜
燕郡太守被賊高開道所圍城陷開道甚禮之會開道
與羅藝通和送祥涿郡卒於塗

權景宣字暉遠天水顯親人父曇騰魏隴西郡守景宣
少聰悟有氣俠宗黨皆歎異之年十七魏行臺蕭寶夤
見而奇之表為輕車將軍及寶夤敗景宣歸鄉里孝武

西遷歷平西將軍秦州大中正大統初轉祠部郎中景
宣曉兵權有智畧從周文拔弘農破沙苑皆先登陷陣
轉外兵郎中從開府于謹援洛陽景宣督課糧儲軍以
周濟時初復洛陽將脩繕宮室景宣率徒三千先出採
運會東魏兵至司州牧元季海等以衆少拔還屬城悉
叛道路擁塞景宣將二十騎且戰且走從騎畧盡景宣
輕馬突圍手斬數級馳而獲免因投民家自匿景宣以
久藏非計乃為作周文書招募得五百餘人保據宜陽

聲言大軍續至東魏將段琛等率衆至九曲憚景宣不敢進景宣恐琛審其虛寔乃將腹心自隨詐云迎軍因得西道與儀同李延孫相會攻拔孔城洛陽以南尋亦來附周文即留景宣守張白塢節度東南義軍東魏將王元軌入洛景宣與延孫等擊走之以功授大行臺左丞進屯宜陽攻襄城拔之獲郡守王洪顯周文嘉之徵入朝錄前後功封顯親男除陽陽郡守郡隣敵境舊制發民守防三十五處多廢農桑而姦宄猶作景宣至並

除之唯脩起城樓多備器械寇盜斂迹人得肆業士民稱之周文特賞粟帛以旌其能遷廣州刺史侯景舉河南來附景宣從僕射王思政經畧應接既而景南叛恐東魏復有其地以景宣為大都督豫州刺史鎮樂口東魏亦遣張伯德為刺史伯德令其將劉貴平卒戍卒及山蠻屢來攻逼景宣兵不滿千人隨機奮擊貴平退走進授使持節車騎大將軍儀同三司潁川陷後周文以樂口等諸城道路阻絕悉令拔還襄州刺史杞秀以狼

須獲罪景宣號令嚴明戎旅整肅所部全濟獨被優賞
仍留鎮州州委以鷄南事初梁宣帝為岳陽王將以襄
陽歸朝仍勒兵攻梁孝元於江陵其叛將杜岸乘虛襲
之景宣乃率騎三千助梁宣梁宣因送其妻王氏及子
察入質景宣又與開府楊忠取梁將柳仲禮拔安陸隨
郡久之隨州城民吳士英殺刺史黃道玉因聚為寇景
宣以英小賊可以計取若聲其罪恐同惡者衆廼與英
書偽稱道玉凶暴歸功英等英等果信之遂相率至景

宣執戮之獲其黨與進攻應城拔之獲夏侯珍洽於是應禮安隨並平朝議以景宣威行南服累進驃騎大將軍開府儀同三司加侍中兼督江北司二州諸軍事唐州蠻田魯嘉自號豫付伯引致齊兵大為民害景宣又破之獲魯嘉以其地為郡轉安州刺史梁定州刺史李洪遠初款後叛景宣惡其懷貳密襲破之鹵其家口及部衆洪遠脫身走免自是酋帥懾服無敢叛者燕公于謹征江陵景宣別破梁司空陸法和司馬羊亮於瀆水

又遣別帥攻拔魯山多造舟艦益張旗幟臨江欲渡以
懼梁人梁將王琳在湘州景宣遺書喻以禍福琳遂遣
長史席壑因景宣請舉州款附周孝閔踐阼徵為司憲
中大夫尋除基郤硤平四州五防諸軍事江陵防主加
大將軍保定四年晉公護東討景宣別畧河南齊豫州
刺史王士良兗州刺史蕭世怡並以城降景宣以開府
謝徹守兗州開府郭彥守豫州以士良世怡及降卒一
千人歸京師尋洛陽不守乃棄二州拔其將士而還至

昌州而羅陽蠻反景宣回軍破之還次霸上晉公護親
迎勞之天和初授荊州刺史總管十七州諸軍事進爵
千金郡公陳湘州刺史華皎舉州款附表請援兵救景
宣統水軍與皎俱下景宣到夏口陳人已至而景宣以
任遇隆重遂驕傲縱恣多自矜伐兼納賄貨指麾節度
朝出夕改將士憤怒莫肯用命及水軍始交一時奔北
戰艦器仗畧無孑遺時衛公直總督諸以景宣負敗欲
繩以軍法朝廷不忍加罪遣使就軍赦之尋遇疾卒贈

河渭鄩三州刺史謚曰恭子如璋嗣

論曰王盟始以親黨升朝終以才能進達勤宣運始位
列周行參迹功臣弗由恩澤誼文武奇才以剛正見忌
有隋受命鬱為名臣末路披猖信有終之克鮮獨孤信
威申南服化洽西州信著遐方光昭鄰國雖不免其身
而慶延于後三代外戚何其盛歟竇熾儀表魁梧器識
雄遠入參朝政則嘉謀屢陳出總藩條則惠政斯洽毅
忠肅奉上溫恭接下茂實彰於本朝義聲播於殊俗並

以國華人望榮映一時熾遲疑勸進有送故之心雖玉
公悵悵何以加此榮定以功懋賞以勞定國保其祿位
貽厥子孫盛矣賀蘭祥叱列伏龜閻慶等雖階緣戚屬
各以功名自終而毗制造之功亦足傳於後葉史寧權
景宣並以將帥之才受內外之寵總戎薄伐著克敵之
功布政蒞民垂稱職之譽若此者豈非有國良翰歟然
史在末年貨財虧其雅志權亦晚節矜驕喪其威聲惜
矣楊諒干紀祥獨克之効亦足稱云

南北史合注卷一百四十八